

A. Bernadetta Caduff, Rueras *1958 – † 2009

bb- Suprimi e pensivs ha il zenn grond fatg vegnir ins quei mument ch'el ha tuccau per nossa vischina Bernadetta Caduff. Tontas gadas han ins entupau ella a spassegiond tras Rueras, ensemen cun ulteriurs cussadents dalla casa Soldanella. Mo il pass grev e runond dils davos onns era aunc vegnius pli grevs il davos temps. Aschia ha in ni l'auter era pudiu dir: «Mo sche lura ha ella gudignau» savend che Bernadetta ha buca giu mo rosas en sia veta. Gie, ella ha segir gudignau ina via grada e directa e sco nus havein enconuschiu ella po ella esser cheu si e cantar, quei ch'ella fageva gia giu sin tiara aschi bugen.



La Bernadetta ei stada impedita ed ha duvrau tuttas forzas per dar damogn ad ina veta cun tuts ses impediments. Che quei ei buc iu tgunsch ed ha custau ad ella sco era als ses pli datier bia pazienza, lavur e forza savein nus forsa s'imaginar mo sentiu quei han mo ella ed ils ses ni talas famiglias cun seme-glionts destins. Ei era ils 17 d'october 1958 ch'ella ei naschida. Siu bab igl Ignazi Caduff e l'Anastasia Caduff-Casanova han giu otg affons. Tgei truscha e travaglia quei era tier ils Cauffs. Denton tons affons en famiglia era prest usit en mintga casa. Malgrad la truscha d'ina gronda famiglia ha ella

saviu passentar ina biala affonza. Ella era propi la poppa dil bab, mo era dils fargliuns eis ella vegnida sustenida beinsavend ch'in affon impediui drovi aunc dapli carezia e quitau.

1965 ha la Bernadetta saviu frequentar la scola en casa Soldanella a Rueras. Ella era ina diligenta scolara, cun bien uorden, fageva bugen caltschiel, zambergiava e malegiava. Cun il scriver ha ella empruau ton sco igl ei iu, mo siu hobby preferiu ei gliez mai daventau. Sia memoria era denton buna; numbs e prenumbs da persunas ha ella adina te-niu endamen e mai emblidau siu di da naschientscha. Siu pli grond plascher ha ella adina giu dalla musica e dil cantar. Gia d'affon seregordel ch'ella ste-va sin scala e cantava igl enconuschen schlager da lu «oh baby, baby bala bala» ch'ins udeva gia lunsch navenda ella acantar. Siu temps preferiu era il tschei-ver. Quei sunem e ramplunem deva ad ella il tac dalla veta, Cheu saveva ella star sin il carr dalla Soldanella e direger persula tuttas musicas che passavan sperasora. Per puder star movibla mava ella bia a spass. Mintgaton in viadi cun

auto era ina purschida ch'ella renviava segir buca. Saver ira cul bab la dumen-gia el hotel Posta e saver presentar siu «schuck» fageva tarlischar sia entira fa-tscha. Tier sia sora Angelica, che ha adi-na giu bien quitau dad ella, ha ella giu caschun da passentar las vacanzas. Tut siu trafficar era tenor sias premissas cor-poralas e spirtalas. Igl ei segir era stau in grond avantatg ch'ella ha adina sa-viu star en siu vitg natal a Rueras. Siu dacasa era la casa paterna, la casa Sol-danella ed igl entir vitg. Ins astga bein dir che tut haveva bugen ella ed in

«Tschau Bernadetta» fageva bein ad ella ed a nus auters.

Sia veta terrestre ei ida ils 30 d'avrel 2009 alla fin. Sur notg eis ella sedur-mentada en e vegnida clamada dil bien Diu. Cara Bernadetta, engrazia per il tschancun via, per las sentupadas e per tia buna luna. Lai resunar tia vusch cheusi sin las neblas e cun Tiu bab vegn ei bein ad esser pusseivel dad ira en in hotel dalla Posta celestiala per sentu-par cun tuts enconuschents e selegrar vinavon da pigns e gronds plaschers. Ruaussa en pasch e sinseveser.